

摘藻堂四庫全書薈要

子部

欽定四庫全書薈要卷一萬七百八

子部

欽定授時通考卷四十五

勸課

官司

詩豳風田畯至喜

傳田畯田大夫也疏畯農夫也農夫田官也今之嗇夫是也此官選俊人主田謂之田畯典農之大夫謂之農夫以王者尤重農事知其爵爲大夫也

又周頌嗟嗟臣工敬爾在公王釐爾成來咨來茹嗟嗟
保介維莫之春亦又何求如何新畬

集註此戒農官之詩保介農官之副也

又率時農夫播厥百穀駿發爾私終三十里亦服爾耕
十千維耦

疏率是主田之吏農夫使民耕田而種百穀農夫主
田之吏也集註亦戒農官之詞蓋成王始置田官而
嘗戒命之也

周禮天官甸師下士二人掌帥其屬而耕耨王藉以時入之以共齎盛

註郊外曰甸師長也其屬府史胥徒也

又地官大司徒卿一人大司徒之職辨十有二壤之物而知其種以教稼穡樹藝

又載師上士二人中士四人掌任土之法凡田不耕者出屋粟

註空田者罰以三家之稅粟以共吉凶二服及喪器

也疏夫三爲屋罰以三夫之稅粟云吉凶二服及喪器是民自共用不可出官物故集此罰物爲之

又問師中士二人任農以耕事凡庶民不耕者祭無盛
註盛黍稷也

又遂人中大夫二人以土宜教田稼穡以興鋤利田以
時器勸田以彊予任田

註時器鑄作耒耜錢鏹之屬彊予謂民有餘力復予
之田

又遂師下大夫四人上士八人中士十有六人旅下士三十有二人各掌其遂之政令戒禁巡其稼穡而移用其民以救其時事

註移用其民使轉相助救時急事也四時耕耨斂艾芟地之宜早晚不同而有天期地澤風雨之急

又遂大夫每遂中大夫一人各掌其遂之政令以歲時稽其夫家之衆寡六畜田野辨其可任者與其可施舍者以教稼穡以稽功事令爲邑者歲終則會政致事正

歲簡稼器脩稼政三歲大比則帥其吏而興眊明其有功者屬其地治者凡爲邑者以四達戒其功事而誅賞廢興之

註功事九職之事所以爲功業簡猶閱也興甿舉民
賢者能者如六鄉之爲興猶舉也

又縣正每縣下大夫一人各掌其縣之政令徵比以頒
田里以分職事趨其稼事而賞罰之

又鄮長每鄮中士一人各掌其鄮之政令以時校登其

夫家比其衆寡若歲時簡器與有司數之凡歲時之戒
令皆聽之趨其耕耨稽其女功

註簡器簡稼器也有司遂大夫

又里宰每里下士一人掌比其邑之多寡以歲時合耦
于耤以治稼穡趨其耕耨行其秩叙

疏耤助也謂合兩兩相佐助於里宰處云以治稼穡
者謂治理其民使爲春耕秋穡

又草人下士四人掌土化之法

又稻人上士二人中士四人下士八人掌稼下地

又土訓中士二人下士四人掌道地圖以詔地事道地

厯

又廩人下大夫二人上士四人中士八人下士十有六人掌九穀之數

又倉人中士四人下士八人掌粟入之藏

又司稼下士八人巡野觀稼以年之上下出斂法

疏觀稼謂秋熟時觀稼善惡

禮記月令命有司發倉廩賜貧窮振乏絕命司空循行國邑周視原野脩利隄防道達溝瀆開通道路毋有障塞

註溝瀆與道路皆不得不通所以除水潦便民事也又命野虞出行田原爲天子勞農勸民毋或失時命司徒循行縣鄙命農勉作毋休于都驅獸無害五穀毋大田獵

又令告民出五種命農計耦耕事

集說令典農之官告民出其所藏五穀之種計度耦耕之事耦二人相偶也

穀梁傳私田稼不善則非吏

註非責也吏田畷也言吏急民使不得營私田

左傳九扈爲九農正

註扈有九種春扈鳩鵲夏扈竊玄秋扈竊藍冬扈竊黃棘扈竊丹行扈喈喈宵扈嘖嘖桑扈竊脂老扈鷦鷯以九扈爲九農之號各隨其宜以教民事疏春扈

鴝鵒相五土之宜趣民耕種夏扈竊元趣民耘苗秋
扈竊藍趣民收斂冬扈竊黃趣民蓋藏棘扈竊丹爲
果驅鳥行扈喈喈晝爲民驅鳥宵扈嘖嘖夜爲農驅
獸桑扈竊脂爲蠶驅雀老扈鷦鷯趣民收麥令不得
晏起謂以扈爲官還令依此諸扈而動作也

管子立政水雖過度無害於五穀歲雖凶旱有所紛獲
司空之事也相高下視肥瘠觀地宜明詔期前後農夫
以時均脩焉使五穀桑麻皆安其處由田之事也行鄉

里視宮室觀樹藝簡六畜以時均脩焉勸勉百姓使力作無偷懷樂家室重去鄉里鄉師之事也

韓詩外傳召伯出就蒸庶於阡陌隴畝之間而聽斷焉廬於樹下百姓大悅耕桑者倍力以勸於是歲大稔民給家足

前漢書惠帝紀四年春正月舉民孝弟力田者復其身又高后紀元年二月初置孝弟力田二千石者一人註特置孝弟力田官而尊其秩欲以勸厲天下令各

敦行本務

又文帝紀十二年置三老孝弟力田常員

又武帝紀元狩三年遣謁者勸種宿麥舉吏民能假貸貧民者以名聞

又平帝紀元始四年置大司農部丞十三人人部一州勸農桑

又百官公卿表治粟內史秦官景帝後元年更名大農
令武帝太初元年更名大司農
驂粟都尉軍官不常置

農都尉武帝初置

又食貨志春令民畢出在墾冬則畢入於邑春將出民里胥平旦坐於右塾鄰長坐於左塾畢出然後歸夕亦如之

註里胥如今里吏也門側之堂曰塾坐於門側者督促勸之知其早晏防怠惰也

又武帝末趙過爲搜粟都尉能爲代田一畝三畝歲代處故曰代田過使教田太常三輔大農置工巧奴與從

事爲作田器二千石遣令長三老力田及里父老善田者受田器學耕種養苗狀民或苦少牛無以趨澤故平都令光教過以人輓犁過奏光以爲丞教民相與庸輓犁率多人者田日三十晦少者十三晦以故田多墾闢過試以離官卒田其宮孺地課得穀皆多其旁田晦一斛以上令命家田三輔公田又教邊郡及居延城是後邊城河東弘農三輔太常民皆便代田用力少而得穀多

又水衡少府太僕大農各置農官

又藝文志農家者流蓋出於農稷之官播百穀勸耕桑
以足衣食

註汜勝之成帝時爲議郎使教田三輔有好田者師
之徙爲御史

又何武傳武爲刺史行部入傳舍出記問墾田頃畝五
穀美惡已迺見二千石以爲常

又黃霸傳霸爲潁川太守務耕桑種樹畜養米鹽靡密

初若煩碎霸精力能推行之

又龔遂傳遂爲渤海太守見齊俗奢侈好末技不田作
廼率以儉約勸民務農桑令口種一樹榆百本鑿五
十本葱一畦韭家二母彘五雞民有帶持刀劍者使賣
劍買牛賣刀買犢春夏不得不趨田畝秋冬課收斂益
畜果實菱芡勞來循行郡中皆有畜積吏民皆富實

又召信臣傳信臣爲南陽太守好爲民興利務在富之
躬勸耕農出入阡陌止舍離鄉亭稀有安居時行視郡

中水泉開通溝瀆起水門提閘凡數十處以廣溉灌歲歲增加多至三萬頃民得其利畜積有餘

後漢書和帝紀永元十六年遣三府掾分行四州貧民無以耕者爲雇犁牛直

又禮儀志立春之日夜漏未盡五刻郡國縣道官下至斗食令史皆服青幘立春幡施土牛耕人於門外以示兆民正月令曰郡國守相勸民始耕

又百官志凡郡國以春行所主縣勸民農桑救乏絕

又邊郡置農都尉主屯田殖穀

又卓茂傳茂遷密令天下大蝗獨不入密縣界督郵言之太守不信自出案行見乃服焉是時王莽秉政置大司農六部丞勸課農桑遷茂爲京部丞密人老少皆流涕隨送

又魯恭傳恭拜中牟令郡國螟傷稼不入中牟河南尹袁安聞之使仁恕掾肥親往廉之曰蟲不犯境此一異也永初元年代鮪爲司徒

又劉寬傳延熹八年徵拜尚書令遷南陽太守典歷三郡每行縣止息亭傳見父老慰以農里之言

又杜詩傳詩拜成臯令再遷爲沛郡都尉轉汝南都尉七年遷南陽太守修治陂池廣拓土田郡內比室殷足時人方於召信臣南陽爲之語曰前有召父後有杜母又張堪傳堪拜漁陽太守開稻田八千餘頃勸民耕種以致殷富百姓歌曰桑無附枝麥穗兩岐張君爲政樂不可支

又秦彭傳建初元年遷山陽太守興起稻田數十頃每
於農月親度頃畝分別肥脊差爲三品各立文簿藏之
鄉縣於是姦吏跼蹐無所容詐

三國魏志武帝紀建安元年募民屯田許下州郡例
置田官所在積穀

又國淵傳太祖欲廣置屯田使淵典其事淵屢陳益相
土處民計民置吏明勸課之法五年中倉廩豐實競勸
樂業

又梁習傳建安十八年習表置屯田都尉領客六百夫
於道次耕種菽粟

又任峻傳太祖以峻爲典農中郎將數年中所在積粟
倉廩皆滿

又蘇則傳則爲金城太守親自教民耕種歲大豐收
又杜畿傳畿拜河東太守課民畜犍牛草馬下逮雞
豚犬豕皆有章程百姓勸農家家豐實

又倉慈傳太祖開幕屯田於淮南以慈爲綏集都尉遷

燉煌太守抑挫權右撫恤孤貧甚得其理大族田地有餘而小民無立錫之土慈皆隨口割賦稍稍使復其本又王昶傳昶爲洛陽典農時都畿樹木成林昶斫開荒萊勤勸百姓墾田特多

晉書職官志郡國及縣農月皆隨所領戶多少爲差散吏爲勸農又縣五百以上皆置鄉三千以上置二鄉五千以上置三鄉萬以上置四鄉鄉置嗇夫一人

文獻通考典農中郎將典農都尉典農校尉並曹公置

晉太始一年罷農官爲郡縣後復有之

晉書食貨志武帝泰始五年敕戒郡國計吏諸郡國守相令長務盡地力禁游食商販

又泰始八年司徒石苞奏州郡農桑宜增掾屬令吏有所循行帝從之苞既明於勸課百姓安之

文獻通考晉元帝課督農功二千石長吏以入穀多少爲殿最其非宿衛要任皆宜赴農使軍各自佃作即以爲廩

晉書王宏傳宏爲汲郡太守撫百姓如家耕桑樹藝屋宇阡陌莫不躬教示曲盡事宜

文獻通考梁司農卿位視散騎常侍主農功倉廩陳因之後因有司農上士一人掌三農九穀稼穡之政令屬大司徒

又勸農謁者梁武帝天監九年置屬司農

魏書文成帝紀元年遣尚書伏真等三十人巡行州郡觀察墾殖田畝

文獻通考魏太武帝令有司課畿內之人各列家別口數所種頃畝明立簿目所種於地首標姓名以辨播殖之功

魏書食貨志天興初制定畿內田四方置八部帥以監之勸課農耕量校收入以爲殿最

隋書公孫景茂傳景茂爲道州刺史好單騎巡人家閱視百姓產業有修理者於都會時乃褒揚稱述如有過惡隨即訓導而不彰也繇是人行義讓有無均通男子

相助耕耘婦子相從紡績大村或數百戶如一家之務
又食貨志河清三年定令每歲春月各依鄉土早晚課
入農桑自春及秋男二十五以上皆布田畝蠶桑之月
婦女十五以上皆營蠶桑孟冬刺史聽審邦教之優劣
定殿最之科品人有人力無牛或有牛無力者須令相
便皆得納種使地無遺利人無游手焉

文獻通考唐龍朔二年改司農爲司稼咸亨初復舊卿
一人少卿一人掌東耕供進耒耜及邦國倉儲之事領

上林太倉鉤盾導官四署

唐書百官志凡十道巡按以判官二人爲佐務繁則有
支使其三察農桑不勤

又諸屯監一人從七品下丞一人從八品下掌營種屯
田句會功課及畜產帳簿以水旱螽蝗定課屯主勸率
營農督斂地課

又節度使兼支度營田招討經畧使則有副使判官各
一人支度使復有遣運判官巡官各一人歲以八月考

其治否觀察使以豐稔爲上考

又田曹司田叅軍事掌園宅口分永業及蔭田

又上州司田叅軍事一人從七品下中州司田叅軍事
一人正八品下下州司田叅軍事一人從八品下五千
人以上有副使一人萬人以上有營田副使一人

又縣令掌導風化凡民田將授縣令給之

文獻通考唐開元十有二年夏四月令兵部員外郎兼
侍御史宇文融兼充勸農使巡按人邑安撫戶口所在

與官僚及百姓商量處分賦役差科於人非便者並量事處分續狀奏聞務令安輯勿使繁勞

又上元二年諸州各置司田叅軍一人主農事每縣各置田正二人於當縣揀明嫻田種者充務令勸課

又寶應元年詔建巳月諸州刺史縣令及司田叅軍令設法勸課令其耕種不得失時貧不能濟戶仍方員處置量事借貸務令存立歲終巡案量其功效

唐書食貨志唐開府軍以扞衝要因隙地置營田天下

屯總九百九十二司農寺每屯三頃州鎮諸軍每屯五十頃水陸腴瘠播殖地宜與其功庸煩省收率之多少皆決於尚書省苑內屯以善農者爲屯官屯副御史巡行莅輸上地五十畝瘠地二十畝稻田八十畝則給牛一諸屯以地良薄與歲之豐凶爲三等與民田歲穫多少以中熟爲率有營則以兵若夫千人助收隸司農者歲三月卿少卿循行治不法者凡屯田收多者褒進之歲以仲春籍來歲頃畝州府軍鎮之遠近上兵部度便

宜遣之開元二十五年詔屯官敘功以歲豐凶爲上下
鎮戍地可耕者人給十畝以供糧方春屯官巡行謫作
不時者

文獻通考唐令諸戶以百戶爲里五里爲鄉四家爲鄰
三家爲保每里設正一人掌按比戶口課殖農桑

又唐考功之法有二十七最二十曰耕耨以時收穫成
課爲屯官之最

唐書裴行儉傳子倩歷信州刺史勸民墾田二萬畝以

治行賜紫金服

又田仁會傳永徽中爲平州刺史歲旱自暴以祈而雨
大至穀遂登人歌曰父母育我兮田使君挺精誠兮上
天聞中田致雨兮山出雲倉廩實兮禮義申願君常在
兮不患貧

又李惠登傳惠登拜刺史政清靜居二十年田畝闢戶
口日增人歌舞之節度使于岫狀其績詔加御史大夫
升隋爲上州

又何易于傳易于爲益昌令縣距州四十里刺史崔朴
常乘春與賓屬汎舟出益昌旁民挽牽易于身引舟朴
驚問狀易于曰方春百姓耕且蠶惟令不事可任其勞
朴愧與賓客疾遣去

五代史雜傳張全義爲河南尹披荆棘勸耕殖躬載酒
食勞民畝畝之間

文獻通考宋太祖開基分命朝臣出守列郡號權知軍
州事軍謂兵州謂民政焉其後文武官叅爲知州軍事

二品以上及帶中書樞密院宣徽使職事稱判太守掌
總理郡政宣布條教歲時勸課農桑旌別孝悌

又建隆元年應天下諸縣除赤畿外有望繫上中下掌
總治民政勸課農桑

宋史太宗紀淳化五年九月遣使分行宋毫陳潁泗壽
鄧蔡等州按行民田被水及種蒔不及者並蠲其租

文獻通考至道元年六月詔州縣官吏勸民墾田之數
悉書於印紙以俟旌賞二年以陳靖爲勸農使按行陳

許蔡穎襄鄧唐汝等州勸民墾田以大理寺皇甫選光祿寺丞何亮副之

宋史真宗紀天禧四年九月分遣近臣張知白晁迥樂黃目等各舉常叅官諸路轉運及勸農使

文獻通考真宗置諸路提點刑獄公事以朝臣充始命屯田李拱爲之副以武臣閤門祗候以上充天禧四年加勸農使俄改提點刑獄勸農使又以武臣爲副使天聖嘉祐中罷熙寧十年復置勸課農桑

又熙寧二年分遣諸路常平官使專領農田水利事應吏民能知土地種植之法陂塘圩埧堤堰溝洫之利害者皆得自言之有效隨大小酬賞

宋史徽宗紀政和元年夏四月立守令勸農黜陟法二年夏四月詔縣令以十二事勸農於境內躬行阡陌程督勤惰

註一曰敦本業二曰興地力三曰戒游手四曰謹時候五曰戒苟簡六曰厚蓄積七曰備水旱八曰戒牽牛

九曰置農器十曰廣栽植十一曰恤苗戶十二曰無
妄訟

文獻通考宋南渡之後紹興十五年閏十一月司農簿
宋樸請令守令以歲仲春出郊勞農遂爲故事

宋史食貨志太平興國中兩京諸路許民共推揀土地
之宜明樹藝之法者一人縣補爲農師令相視田畝肥
瘠及五種所宜

文獻通考宋制委戶部長貳左曹分按法曰農田掌農

田及田訟務限奏豐稔驗水旱蟲蝗勸課農桑請佃地
土令佐任滿賞罰繳奏諸州雨雪檢按災傷逃絕人戶
又初朝議置勸農之名然無職局天禧四年始詔諸路
提點刑獄朝臣爲勸農使使臣爲副使所至取民籍視
其差等不如式者懲革之勸恤農民以時耕墾招集逃
散檢括稻稅凡農田事悉領焉

金史章宗紀泰和三年六月遣官行視中都田禾水澤
分數八年夏四月詔諭有司以苗稼方興宜速遣官分

道巡行農事以備蟲蝻

又宣宗紀興定四年秋七月詔叅知政事李復亨爲宣慰使御史中丞完顏伯嘉副之循行郡縣勸農

元史世祖紀至元六年八月詔諸路勸課農桑命中書省采農桑事列爲條目仍令提刑按察司與州縣官相風土之所宜講究可否別頒行之

又至元七年二月立司農司以叅知政事張文謙爲卿設四道巡行勸農司閏十一月申明勸課農桑賞罰之

法十二月改司農司爲大司農司添設巡行勸農使副
各四員以御史中丞博羅兼大司農卿

又張文謙傳文謙邢州沙河人至元七年拜大司農卿
奏立諸道勸農司巡行勸課

又董文用傳至元八年立司農司授山東東西道巡行
勸農使文用巡行勸勵無間幽僻入登州境見其墾闢
有方以郡守移刺某爲能作詩表異之於是列郡咸勸
地利畢興五年之間政績爲天下勸農使之最

明史職官志戶部尚書以樹藝課農官以蠲減賑貸均糴捕蝗之令憫災荒

又方克勤授濟寧知府時始詔民墾荒閏三歲乃稅吏徵率不俟期民謂詔旨不信輒棄去田復荒克勤與民約稅如期區田爲九等以差等徵發吏不得爲奸野以日闢視事三年一郡饒足

又陳幼學授確山知縣墾萊田八百餘頃調繁中牟縣南荒地多茂草根深難墾令民投牒者必入草十斤未


幾草盡得沃田數百頃悉以畀民有大澤積水占膏腴地二十餘里幼學疏爲河者五十七爲渠者百三十九俱引入小清河民大獲利遷湖州知府霖雨連月禾盡死幼學大舉荒政活飢民三十四萬有奇

欽定授時通考卷四十五

謹案卷四十五第二十一頁前二行博囉舊作字

羅今改





總校官庶吉士臣侍朝

校對官編修臣裴謙

謄錄監生臣曹秀榆

欽定四庫全書薈要

子部

欽定授時通考卷四十六

七

詳校官主事臣陳本



欽定四庫全書薈要卷一萬七百九

子部

欽定授時通考卷四十六

勸課

祈報

詩小雅以我齊明與我犧羊以社以方我田既臧農夫
之慶琴瑟擊鼓以御田祖以祈甘雨

傳社后土也方迎四方氣於郊也田祖先嗇也箋秋
祭社與四方為五穀成熟報其功也御迎也疏孟春

月以琴瑟及擊其土鼓以迎田祖先嗇之神而祭之
所以求甘澍之雨也

又大雅以興嗣歲

箋嗣歲今新歲也以先歲之物齊敬祀輒而祀天者
將求新歲之豐年也

又周頌以似以續續古之人

傳以似以續嗣前歲續往事也箋殺牲報祭社稷嗣
前歲者復求有豐年也續往事者復以養人也續古

之人求有良司穡也

詩小序噫嘻春夏祈穀于上帝也

箋祈猶禱也求也月令孟春祈穀于上帝是也疏郊
以報天而必兼言祈穀者以人非神之福不生為郊
祀以報其已往又祈其將來故祈報兩言之也

又豐年秋冬報也

集註此報賽田事之樂歌

又載芟春藉田而祈社稷也

疏王者於春時親耕藉田以勸農業又祈求社稷使
獲其年豐歲稔焉

又良耜秋報社稷也

疏太平之時年穀豐稔以為由社稷之所祐故於秋
物既成王者乃祭社稷之神以報生成之功焉朱註
此亦報賽田事之樂歌

周禮地官州長以歲時祭祀州社

疏歲時歲之二時春秋耳春祭社以祈膏雨望五穀

豐熟秋祭社者以百穀豐稔所以報功故云祭祀州社也

又黨正春秋祭崇國索鬼神而祭祀

註崇謂雩崇水旱之神荆川稗編雩以祈雨崇以祈晴王昭禹曰索鬼神而祭祀乃萬物之神蓋萬物所以生所以成凡人之欲皆有以養之凡人之求皆有以給之孰為此者其神乎先王於是有報禮焉凡索鬼神之祭所以報本而反始也鄭鍔曰蜡言其名索

言其實

又鼓人以靈鼓鼓社祭

註靈鼓六面鼓也社祭地祇也

又春官小宗伯大哉及執事禱祠于上下神永

註執事大祝及男巫女巫也求福曰禱得求曰祠疏
大哉者謂國遭水火及年穀不熟則禱祠于上下天
地神祇禱祠兩言之者欲見初禱後得福則祠之也
又肆師社之日涖卜來歲之稼

註社祭土為取材焉卜者問後歲稼所宜疏祭社有
二時謂春祈秋報之者報其成熟之功今卜者來歲
亦如今年宜稼也

又籥章凡國祈年于田祖歛豳雅擊土鼓以樂田畯國
祭蜡則歛豳頌擊土鼓以息老物

註祈年祈豐年也田祖始耕田者謂神農也王昭禹
云豐年雖本於天時順而祈之亦成乎人事爾先嗇
神農也以其始教天下耕稼故祈之陳及之云田畯

田大夫古有功於農事者成周之時春祈年於上帝
田祖田畯皆祭之詩曰以御田祖以祈甘雨以介我
黍稷先王蓋以田祖田畯其生也有功於農事今農
事將興舉而祭之不惟示重農之意亦所以勸農之
力田者況大如上帝則祈之次如社稷則祈之則祈
田祖田畯尚何疑乎李景齊云祈年之禮王政之所
急先故宜歌雅小雅甫田之詩所謂祈年而吹豳雅
者毋乃在是乎祭蜡而吹豳頌蓋頌者以其成功告

神明而蜡祭之設所以答鬼神之功故宜歌頌

又大祝掌六祝之辭一曰順祝

註順祝順豐年也

又小祝掌小祭祀以祈福祥順豐年逆時雨寧風旱

註釋順豐年而順為之祝辭者按管子云倉廩實而知禮節衣食足而知榮辱意皆欲知此是豐年順民意也故設祈禮以求豐年而順民故云為之祝辭也
又夏官大司馬火弊獻禽以祭社

月令廣義註春田主祭社以土方施生有祈焉

又羅弊致禽以祀祊

註祊當為方秋田主祭四方報成萬物也註釋以秋物成四方神之功故報祭之云

禮記月令擇元日命民社

註社后土也使民祀焉神其農業也月令廣義注為春事興故祭之所以祈農也

又仲夏之月命有司為民祈祀山川百源大雩帝用盛

樂乃命百縣雩祀百辟卿士有益於民者以祈穀實
廣義註為民祈雨以祀也雩者吁嗟其聲以求雨之
祭若周禮女巫凡邦之大裁歌哭而請亦其義也

又季秋之月大饗帝

方慤曰雩所以祈也饗所以報也祈必以仲夏者以
陰生於午而物成之始也以祈物之成而已報必於
季秋者以陽窮於戌而歲功之終也所以報歲之功
而已

又命主祠祭禽于四方

註以所獲禽祀四方之神也司馬職曰羅弊致禽以祀祊疏秋時萬物以成獵則以報祭社及四方為主也

又孟冬之月天子乃祈來年於天宗大割祠于公社
註此周禮所謂蜡祭也疏天宗故云祈社是報功故云割

又乃畢山川之祀及帝之大臣天之神祇

註四時之功成於冬孟月祭其宗此可以祭其佐也
帝之大臣勾芒之屬天之神祇司中司命風師雨師
又禮運祀社于國所以列地利也

疏天子至尊而猶自祭社欲使報恩之禮達於下也
地出財故云列地利也

又郊特牲唯為社事單出里唯為社田國人畢作唯社
丘乘共粢盛所以報本反始也

疏報美結也皇氏云國人畢作是報本而丘乘共粢

盛是反始言棗盛是社所生故云返始也

又天子大蜡八伊耆氏始為蜡蜡也者索也歲十二月合聚萬物而索饗之也

疏伊耆氏神農也以其初為田事故為蜡祭以報天也集註蜡祭八神先嗇一司嗇二農三郵表畷四貓虎五坊六水庸七昆蟲八合猶閉也閉藏之月萬物各已歸根復命聖人欲報其神之有功者故求索而祭享之也

又蜡之祭也主先嗇而祭司嗇也祭百種以報嗇也

註先嗇神農也報嗇謂報其教民樹藝之功祭百種者報其助嗇之功使盡饗焉

又饗農及郵表畷禽獸仁之至義之盡也

疏不忘恩而報之是仁有功必報之是義也

又祭有祈焉有報焉

註祈猶求也報謂若穫禾報社也

公羊大雩者何旱祭也

註雩旱請雨祭名不解大者祭言大雩大旱可知也
又言雩則旱見言旱則雩不見

註必言雩者善其能戒懼天災應變求雨憂民之急
也

穀梁雩月正也雩得雨曰雩不得雨曰旱

註雩者夏祈穀實之禮也旱亦用焉

又秋大雩雩之為非正何也毛澤未盡人力未竭未可
以雩也

疏非必百穀至而雩祀之設本為求雨求雨之意指
為祈穀故周頌噫嘻之篇歌春夏而同名至於修雩
祀不異故此傳言毛澤未窮人力未竭言人力之功
施於種植種植之義在於禾黍也聖人重禱請請必
為民民之本務在於春夏春夏祈穀先嚴其犧牲具
其器物謹修其禮冀精神有感故一時盡心專力求
請求請不得失時

左傳夫郊祀后稷以祈農事也

疏神以人為主人以穀為命人以精意事天天以宜稼佑人以此謂之祈農

又龍見而雩

註建巳之月萬物始盛待雨而大故祭天遠為百穀求膏雨

又秋大雩旱也

註雩夏祭所以祈甘雨若旱則又修其禮故雖秋雩非書過也

又山川之神則水旱癘疫之災於是乎禋之日月星辰之神則雪霜風雨之不時於是乎禋之

註有水旱之災則禋祭山川之神若臺駘者周禮四曰禋祭為營僎用幣以祈福祥星辰之神若實沈者疏禋是祈禱之小祭耳山川之神其祭非有常處故臨時營其地立僎表用幣告之以祈福祥也

國語土發而社助時也收攢而烝內要也

註土發春分也周語曰土乃脉發社者助時求福為

農始也攢拾也冬祭曰烝因祭社以納五穀之要休
農夫也

又社而賦事烝而獻功

註社春分祭冬祭曰烝

爾雅釋訓舞號雩也

註雩之祭舞者吁嗟而求雨疏雩之祭有舞有號雩
之言遠也遠為百穀祈膏雨也

史記社所以親地也地載萬物天垂象取材于地取法

王社亦謂春祈藉田秋而報之也

又太社為羣姓祈報祈報有時主不可廢故凡被社釁鼓主奉以從是也

齊禮志晉永和中雩祈上帝百辟歌雲漢詩皆以孟夏得雨報太牢

又何佟之議古者孟春郊祀祈嘉穀孟夏雩祭祈甘雨二祭雖殊而所為者一禮唯有冬至報天初無得雨賽帝今雖闕冬至之祭而南郊兼祈報之禮不容別有賽

答之事也

宋禮志臘者接也新故相接畋獵禽獸以享百神報終成之功也

隋禮儀志古先王法施於人則祀之故以句龍主祀周棄主稷而配焉歲凡再祭蓋春求而秋報也

又南郊之祭即是園丘日南至於其上以祭天春又一祭祈農謂之二祭無別天也

又何佟之議今之郊祭是報昔歲之功而祈今年之福

故取歲首上辛不拘立春之先後周冬至於圜丘大報
天也夏正月郊以祈農事故有啟蟄之歲自晉太始二
年並圜丘方澤同於二郊是知今之郊裡禮兼祈報不
得限以二途也帝曰圜丘自是祭天先農即是祈穀但
就陽之位故在郊也冬至之後陽氣起於甲子既祭昊
天宜在冬至祈穀時可依古必須啟蟄在一郊壇分為
二祭自是冬至謂之祀天啟蟄名為祈穀

唐禮樂志王仲丘議夫祈穀本以祭天也然五帝者五

行之精所以生九穀也宜於祈穀祭昊天而兼祭五帝
冊府元龜唐開元二十五年勅時和年豐神所福也精
意備物祭之義也朕每為蒼生嘗祈稔歲微誠有感不
應乃彰今宗社降靈神祇効祉三時不害百穀用成遂
使京坻遍於天下和平之氣既無遠而不通禋祀之典
亦有祈而必報

又唐天寶元年詔社為九土之尊稷乃五穀之長春祈
秋報祀典是尊而天下郡邑所置社稷等如聞祭事或

不備禮苟崇敬有虧豈靈祇所降欲望和氣豐年焉可致也朕永惟典故務在潔誠俾官吏盡心庶蒼生蒙福自今已後應祭官等庶事宜倍加精潔以副朕意其社壇側近仍禁樵牧至如百姓私社宜與官社同日致祭又天寶三年遣使分祀嶽瀆詔務農勸穡雖用天道人和歲稔實賴休徵頃者春夏之交稍愆時雨收穫之際復屬秋霖慮害農功每祈孚佑遂得百神降福羣望效靈既不為災仍多善熟幽贊之德普洽於生人昭報之

儀式遵於祀典

又八年詔九州之鎮實著禮經三代之典必崇望秩事
既屬於報功義有符於錫命其九州鎮山除入諸嶽外
宜並封公仍各置祠守者量更增修儲慶發祥當申昭
報宜令所在長官各陳祭禮名山大川亦量事致祭
又十四年制書云咸秩羣望詩曰懷柔百神永惟明徵
豈忘昭報今秋稼穡頗勝當年實賴靈祇福臻稔歲其
五嶽四瀆所在山川及得道昇仙靈跡之處宜委郡縣

長官至秋後各令醺祭務崇嚴潔式展誠享

淮南子郊天望山川禱祀而求福雩禋而請雨

白虎通王者報地德禮西郊

又王者所以有社稷何為天下求福報功人非土不立
非穀不食土地廣博不可徧敬也五穀衆多不可一一
而祭也故封土立社示有常尊稷五穀之長故封稷而
祭之也

又稷者得陰陽中和之氣而用尤多故為長也歲再祭

何春求穀之義也

又諸侯社稷皆少牢社稷為報功諸侯一國所報者少也

又太社為天下報功王社為京師報功

又大夫有民其有社稷者亦為報功也

孝經緯社土地之主也土地濶不可盡敬故封土為社以報功也稷五穀之長也穀衆不可徧祭故立稷神以祭之

援神契仲夏獲禾報社祭稷以三牲何重功故也

月令廣義注按中夏無禾可獲報稷當在秋

春秋繁露大旱雩帝而請雨大水鳴鼓而攻社

解大旱陽滅陰也雖太甚拜請之而已大水者陰滅陽也故鳴鼓而攻之

又旱求雨令縣邑以水日令民禱社

論衡社稷報生萬物之功社報萬物稷報百穀

又東方主春春主生物故祭歲星求春之福也四方皆

有力於物獨求春者重本尊始也

又春秋魯大雩旱求雨之祭也旱久不雨禱祭求福

又春二月雩秋八月亦雩春祈穀雨秋祈穀實

又大水鼓用牲于社亦古禮也為水旱者陰陽之氣也
滿六合難得盡祀故修壇設位敬恭祈求敘事社之義
也

說文夏祭樂于赤帝以祈甘雨

又祈穀食新曰離腰

又雩祭請祈人君精誠也

又雩之禮為民祈穀雨祈穀實也春求實一歲再祀蓋重穀也

風俗通祀典既已立稷又有先農無為靈星復祀后稷也左中郎將賈逵說以為龍第三有天田星靈者神也故祀以報功

又臘接也新故交接狎臘大祭以報功也

玉燭寶典蜡者報百神

文心雕龍天地定位祀徧羣神六宗既禋三望咸秩甘
雨和風是生黍稷兆民所仰美報興焉

柳宗元蜡說柳子為御史主祀事將蜡進有司以問蜡
之說則曰合百神於南郊以為歲報者

陳氏禮書古者言社必及方則社為民祈方為民報祈
在春報在秋

又社所以祭五土之永稷所以祭五穀之神五穀之神
而命之稷以其首種先成而長百穀故也稷非土無以

生土非稷無以見生生之効故祭社必及稷以其同功
均利而養人故也祭法王社侯社無預農事故不置稷
大社國社則農之祈報在焉故皆有稷

潛確類書開元十一年親祠后土為蒼生祈穀自是神
明昭佑累年豐登有祈必報禮之大者

杜氏通典報田之祭其神曰先嗇即神農初為田事故
以報之

又蜡之義自伊耆氏之代而有其禮古之君子使之必

報之是報田之祭也其神神農初為田事故以報也

又周仲秋辰日祭靈星於國之東南王者所以復祭靈星者為人祈時以種五穀故別報其功

文獻通攷蜡祭也所以報一歲之成功求嗣歲之福也又沙隨程氏曰八蜡之祭為民設教也厚矣古有始為稼穡以易佃漁俾吾卒歲無饑不與禽獸爭一旦之命者繫先嗇是德故祭先嗇焉曰司嗇者謂修明其政而潤色之者也曰農者謂傳是業以授之於我者也曰郵

表綴者綴井田間道也郵表也者謂畫疆分理以是為準者也昔之人為是而勞今我蒙之而逸蓋不得不報也曰猫虎者謂能除鼠豕之害吾稼者也曰坊者謂昔為隄防之人使吾禦水患者也曰水庸者謂昔為畎澮溝洫使吾為旱備者也曰昆蟲者先儒謂昆蟲害稼不當與祭乃易以百種是不然所謂昆蟲者非祭昆蟲也祭其除昆蟲而有功於我者也夫以表綴坊庸之賤隸猫虎昆蟲之細效吾不敢忘皆得以上配先嗇司嗇之

享其民勸於功利推而廣之等而上之視君親如天地而不敢慢也

文獻通攷註杵臼門外祈穀於天也

又后稷始為農事故祭以求年豐

事物紀原十月農功畢里社置酒食以報田神因相顧樂或謂坐禮始於周人之蜡云

荆川稗編旱雩禁舉火故雩以祈雨用皂衣縈以祈晴用朱衣

又歌雲漢於雩旱祈雨多在六月以林鐘商譜首章以林鐘羽譜後七章此詩誠古人雩祭所歌然今未必能信用唯以陰求陰則救旱請雨者所宜急

曾氏農書記曰農事有祈焉有報焉所以治其事也天下通祀惟社與稷社祭土句龍配焉稷祭穀后稷配焉此二祀者實主農事載芟之詩春耜田而祈社稷也良耜之詩秋報社稷也此先王祈報之明典也匪直此也山川之神則水旱癘疫之不時於是乎禋之日月星辰

之神則雪霜風雨之不時於是乎崇之與夫法施於民者以勞定國者能禦大菑者能捍大患者莫不秩祀先王載之典禮著之令式歲時行之凡以為民祈報也周禮籥章凡國祈年於田祖則敔豳雅擊土鼓以樂田畯爾雅謂田畯乃先農也於先農有祈焉則神農后稷與世俗流傳所謂田父田母皆在所祈報可知矣大田之詩言去其螟螣及其蟊賊無害我田穉田祖有神秉畀炎火有渰淒淒興雨祁祁雨我公田遂及我私此祈之

之辭也甫田之詩言以我齊明與我犧羊以社以方我
田既臧農夫之慶此報之之辭也繼而琴瑟擊鼓以御
田祖以祈甘雨以介我黍稷以穀我士女此又見因所
報而寓所祈之義也若夫噫嘻之詩言春夏祈穀於上
帝蓋大雩帝之樂也豐年之詩言秋冬報者烝嘗之樂
歌也然於上帝則有祈而無報於祖妣則有報而無祈
豈闕文哉抑互言之耳此又祈報之大者也又育蠶者
亦有祈禳報謝之禮皇后祭先蠶至庶人之婦亦皆有

祭此后妃與庶人之祭雖貴賤之儀不同而祈報之心一也至於牛最農事之所資反闕祭禮蓋古者未有牛耕故祭有關典至春秋之時始教牛耕後世田野開闢穀實滋盛皆出其力雖知有愛重之心而曾無愛重之實近年耕牛疫癘損傷甚多亦曷禳禱祓除祛禍祈福以報其功力宜為過哉亦不忘乎穀之所自農之所本也

東陽縣志夏至凡治田者不論多少必具酒肉祭土穀

之神東草立標插諸田間就而祭之為祭田婆蓋麥秋既祭稻禾方茂義兼祈報矣

又六月六日農家於是日祀穀神謂之六六福蓋亦農人祈穀報賽之義

月令廣義三月初三日祈農

註南齊志祓祭也

又三月三日清明之節將修事於水側禱祀以祈年豐又秋報社

註月令無文意豐年然後報

又十二月臘報神

註漢舊儀臘者報諸鬼神古聖賢有功於民者也

農政全書蜡祭與藉田相為終始當夫東作方興之始
既舉藉田之禮以祀先農於春而以帥先農民以興其
務本之心則夫百穀告成之後載舉大蜡之禮以報先
嗇於冬而以勞來農民以報其勤動之苦是故舉先王
莫大之禮是亦廣聖君莫大之恩也

又大雩者祭於帝而祈雨也一說郊祀天祈農事雩祭山川而祈雨也

又按禮志祈報周官太祝掌六祝之辭以事鬼神永祈福祥於是歷代皆有禋禋之事宋因之有祈有報祈用酒脯醢郊廟社稷或用少牢其報如常祀

欽定授時通考卷四十六

欽定四庫全書薈要卷一萬七百十

子部

欽定授時通考卷四十七

勸課

本朝重農

敕諭一

太祖高皇帝

諭今日仗義伐明天必佑我天佑可以克敵但我國儲積未充縱得其人民畜產何以養之若養其人民畜產恐

我國之民反致耗損惟及是時撫輯吾國固疆圉修邊
備重農積穀為先務耳

太宗文皇帝

天聰七年

諭各牛录額真曰田疇廬舍民生攸賴勸農講武國之大
經爾等宜各往該管屯地詳加體察不可以部務推諉
若有二三牛录同居一堡者著於各田地附近之處大
築牆垣散建房屋以居之遷移之時宜聽其便至於樹

藝之法窪地當種梁稗高田隨地所宜種之地瘠須加
培壅耕牛須善飼養爾等俱一一嚴飭如貧民無牛者
付有力之家代種一切徭役宜派有力者勿得累及貧
民如此方稱牛朶額真之職若以貧民為可虐濫行役
使惟爾等子弟徇庇免其差徭則設爾牛朶額真何益
耶至所居有卑濕者宜令遷移若憚於遷移以致傷稼
害畜俱爾等牛朶額真是問方今疆土日闢凡田地有
不堪種者儘可更換許許部臣換給如給地之時爾等

牛泉額真章京自占便地沃壤將遠瘠之地分給貧人
許貧人陳訴

崇德二年

諭昨歲春寒耕種失時以致乏穀今歲雖復春寒然三陽
伊始農事不可失也宜早勤播種而加耘治焉夫耕耘
及時則稼無災傷可望有秋若播種後時耘治無及或
被蟲災或逢水澇穀何由登乎凡播種必相其土宜土
燥則種麥穀土濕則種秫稗各屯堡撥什庫無論遠近

皆宜勤督耕耘若不時加督率致廢農事者罪之

世祖章皇帝

順治六年

諭自兵興以來地多荒蕪民多逃亡流離無告深可憫惻
著戶部都察院傳諭各撫按轉行所司凡各處逃亡民
人不論原籍別籍必廣加招徠編入保甲俾之安心樂
業察本地方無主荒田州縣官給以印信執照開墾耕
種永准為業俟耕至六年之後有司官親察成熟畝數

撫按勘實奏請奉旨方議徵收錢糧其六年以前不許
開徵不許分毫僉派差徭如縱容衙官衙役鄉約甲長
借端科害州縣印官無所辭罪務使逃民復業田地開
闢漸多各州縣以招民勸耕之多寡為優劣道府以責
成催督之勤惰為殿最每歲終撫按分別具奏

順治八年

諭田野小民全賴地土養生朕聞各處圈占民地以備畋
獵往來下營之所夫畋獵原為講習武事古人不廢然

恐妨民事必於農隙今乃奪其耕耨之區斷其衣食之路民生何以得遂朕心大為不忍爾部速令地方官將前圈地土盡數退還原主令其乘時耕種

諭朕出獵回見禾稼茂盛足覘有秋恐爾等仍前放鷹馳獵以致蹂躪田禾殊堪軫念今後必俟農隙之時方許放鷹勿得玩違

順治十二年

諭戶部曰朕有天下皆我

太祖

太宗積德施仁開創鴻緒以貽藐躬朕既為生民之主一夫不獲時厘朕衷念自明運式微流賊煽亂朕奉

天成命救民於水火之中率土人民如依父母以為必蒙愛育得享昇平豈意比年以來水旱頻仍干戈未靖轉輸旁午民不聊生蕩析離居鬻及妻子乳乳無告轉輾呼號想其怨咨必歸於朕言念及此何以仰副

祖宗付託之意中夜以興潛焉出涕雖未能減賦蠲租實

欲除苛去甚與良有司共圖休養已有諭旨令內外大小官員悉心條奏通達下情嗣後各地方錢糧凡橫斂私徵暗加火耗荒田逃戶灑派包賠非時預徵蠲免不實災傷遲報踏勘騷擾妄興詞訟妨奪農時等弊一切嚴行禁革有違犯者該督撫即行糾叅治罪如督撫狗縱部院科道官訪實劾奏

順治十四年

諭時方入秋田禾在野必雨暘時若乃望西成今霖潦未

休傷稼可慮干和召沴定有由來朕夙夜祇懼循省愆尤大小臣工亦俱宜洗心滌慮協圖修省以格

天心仍遣官於

圜丘虔禱晴霽

順治十七年

諭令夏亢陽日久農事堪憂朕念致災有由痛自刻責穀
為民天非雨不遂竭誠祈禱積有日時乃精誠未達雨
澤尚稽晝夜焦心不遑啟處茲卜是月之十三日豫行

齋戒黎明步至南郊是夜子刻祭告

圜丘祈禱甘雨以拯災黎若仍不雨則再行躬禱務回
天意

聖祖仁皇帝

康熙十年

諭禮部今歲三春無雨風霾日作耕種愆期民生何賴皆
由朕躬涼德政治未協大小臣工不能殫忠為國恪修
職業瞻顧因循惟圖自便偏私怠忽致干天和用是朕

夙夜靡寧深切儆惕今實圖修省勵精勤政體

上天仁愛之意感召休和為民請命內閣六部都察院等衙門大小官員各有職掌皆宜體朕倚任至意共効贊襄持廉秉公克盡厥職洗心滌慮痛改前非以迓天和爾部即遵諭通飭祈雨事宜照例作速舉行

諭今已入夏亢暘不雨農事堪憂朕念切民生躬自刻責特頒嚴旨戒飭各臣修省過愆祈求雨澤乃精誠未達霖雨尚稽朕心晝夜焦勞不遑啟處茲朕虔誠齋戒躬

詣

天壇祭告懇祈甘霖速降以拯生民爾部作速擇吉其祭告儀物即行備辦

諭耕藉大典事關勸農來春應照例舉行其應行事宜詳
察典例具奏

康熙十二年

諭戶部自古國家久安長治之謨莫不以足民為首務必使田野開闢蓋藏有餘而又取之不盡其力然後民氣

和樂聿成豐亨豫大之休見行墾荒定例俱限六年起
科朕思小民拮据開荒物力艱難恐催科期迫反致失
業朕心深為軫念以後各省開墾荒地俱著再加寬限
通計十年方行起科其該管地方官員原有議敘定例
如新任之官自圖紀敘故掩前功紛更擾民者著各該
督撫嚴行稽察題叅處分

康熙十八年

諭禮部民資粒食以生今時值夏令雨澤未降久旱傷麥

秋種未下農事堪憂皆由朕躬涼德政治未協大小臣工不能廉已愛民勤修職業致干天和朕用是夙夜靡寧深切警惕實圖修省諸臣亦宜循省過愆恪共乃職期於共襄治理感召休和茲當虔誠齋戒躬詣

天壇親行祈禱為民請命爾部即擇期具儀來奏

諭民生以食為天必蓋藏素裕而後水旱無虞自古耕九餘三重農貴粟所以藏富於民經久不匱洵國家之要務也比以連年豐稔粒米充盈小民不知蓄積恣其狼

戾故去年山東河南一逢歲歉即以饑饉流移見告雖
議蠲議賑加意撫綏而被災之民生計難遂良由地方
有司各官平日不以民食為重未行申明勸諭之故近
據四方奏報雨澤霑足可望有年恐豐熟之後百姓仍
前不加撙節妄行耗費著各該地方大吏督率有司曉
諭小民務令力田節用多積米糧庶俾俯仰有資凶荒
可備以副朕愛養斯民至意

康熙二十一年

諭禮部農事為民生之本必雨雪以時庶春耕不悞秋成
可期今歲入冬以來尚未降雪愆陽日久時序失宜田
畝曠乾恐妨明年東作應虔行祈禱爾部即照例作速
舉行

康熙二十三年

諭戶部民為邦本必年穀順成家給人足乃愜朕撫育羣
生之意比者巡行近畿見閭閻生計僅支日用乃米價
漸貴民食維艱又聞河南地方年歲荒歉所在苦饑小

民無以資生恐致流移失所朕心深切軫念直隸應作何平糴及勸諭捐輸河南應行緩徵併鼓勵捐輸設法賑濟等項事宜著九卿詹事科道會同確議具奏

諭吏部尚書伊桑阿朕車駕南巡省民疾苦路經高郵寶應等處見民廬舍田疇被水淹沒朕心深為軫念詢問其故緣高寶等處湖水下流原有海口以年久淤塞遂致壅塞今將入海故道濬治疏通可免水患自是往還每念及此不忍於懷此一方生靈必圖拯濟安全咸使

得所始稱朕意爾同工部尚書薩木哈往被水災州縣
逐一詳勘期於旬日內覆奏務期濟民除患縱有經費
在所不惜爾等體朕至意速行

康熙二十五年

諭工部右侍郎孫在豐朕前因巡幸爰至江南見高寶興
鹽山江泰等處積水汪洋民罹昏墊朕甚憫之應行開
濬下河疏通海口俾水有所歸民間始得耕種特發帑
金拯救七邑災民屢集廷議兼詢輿情允協僉謀事當

釐舉茲命爾前往淮揚所屬下河一帶車路等河并串
場河白駒丁溪草堰場等口挑濬事務專屬於爾監修
爾宜往來親歷多方經畫講求源流脉絡次第興工督
率帶去司官等務實心任事毋得怠忽擾害其司道府
廳州縣等官如有違犯貽誤及勢豪縉衿妄行干預包
攬生事阻撓工程者指名叅奏濬過工程丈尺用過夫
料數目造冊畫圖貼說具奏爾受茲專委須竭忠盡力
悉心區處速竣大工使海口疏通水消田壅蒸黎復業

以副朕救民至意

諭大學士勒德洪等曰者遣部員自幾林烏喇至黑龍江以蒙古席白達呼里索倫等人力耕種田穀大穫夫民食所關至重來歲仍遣前種田官員以蒙古席白達呼里索倫等人力耕種郎中博奇所監種田地較諸處收穫為多足供驛站人役之口糧又積貯其餘穀博奇効力視衆為優其註之冊此遣去諸員可互易其地監視耕種博奇又復大穫則議敘焉

康熙二十八年

諭山東巡撫錢珪朕軫恤民隱載舉時巡懋宣德化勤求疾苦比至山東所經城邑百姓扶老攜幼夾道歡迎朕問及連歲順成民生少得安業第思百姓足則國家充裕若期比戶豐盈必以蠲租減賦除其雜派為先邇年以來各省地丁錢糧已經節次豁免山東地丁正賦意欲來歲蠲除茲因巡幸至此特先諭該撫速行曉示日傳三百里遐村僻壤咸使聞知以副朕省耕問俗之意

諭內閣項者時已初夏雨澤雖降而猶未霑足其命禮部
照前祈禱之禮三日禁止殺牲不理刑名事務虔恭齋
祓以祈甘雨

諭大學士伊桑阿今歲早已久其傳諭九卿詹事科道朕
與卿等靜處以俟之耶應行應革事有無耶抑何以禱
祀而求之耶其會同詳議以聞

諭禮部時已仲夏雨澤未霑農事堪憂已經遣官於諸壇
祈求未應朕夙夜靡寧今特遣官於

天壇

地壇

社稷壇虔行禱祀爾部即察例擇期來奏

諭禮部自春徂夏時雨愆期朕念切民生躬自刻責祇祓
齋居戒飭臣工共圖修省曾經遣官徧禱

天地神祇微雨雖降未沛祥霖今三伏屆期農事可慮朕
心彌切焦勞不遑寧處茲乃潔誠齋戒遣官於

天壇虔行禱祀尚期仰格

蒼昊下拯黔黎爾部即察例擇日來奏

康熙二十九年

諭戶部朕撫御區宇夙夜孜孜惟期厚民之生使漸登殷
阜重念食為民天必蓋藏素裕而後水旱無虞曾經特
頒諭旨著各地方大吏督率有司曉諭小民務令多積
米糧庶俾俯仰有資凶荒可備已經通行其各省徧設
常平及義倉社倉勸諭捐輸米穀亦有旨允行後復有
旨常平等倉積穀關係最為緊要現今某省實心奉行

某省奉行不力著再行各該督撫確察具奏朕於積貯一事申飭不啻再三藉令所在官司能具體朕心實有儲蓄何至如直隸地方偶罹旱災輒為補苴之術嗣後直省總督巡撫及司道府州縣官員務宜恪遵屢次諭旨切實舉行俾家有餘糧倉庾充牣以副朕愛養生民至意

諭戶部朕惟阜民之道端在重農必東作功勤然後西成有賴畿輔地方去歲遭罹荒歉已經蠲免錢糧特發帑

金兼支倉粟賑濟雖小民糊口有資其子粒牛具恐多
匱乏今時屆首春田功肇始若弗經營措給將誤俶載
之期播種不齊倉箱何望直隸被災州縣衛所窮民有
不能自備牛種等項者該督撫率有司勸諭捐輸及時
分行助給務令田疇徧得耕易毋致少有荒蕪八旗官
兵皆倚屯莊收穫用以資生若有被災貧乏耕作無力
者該都統等通行各該佐領酌量伙助牛種所有莊田
勿致播種後時以副朕敦本勸農愛養兵民至意

康熙三十年

諭戶部塞外聚穀甚屬要務故耕稼土田以廣積貯為至切也達爾湖之地其田以內府莊田之人耕之可令總管內務府於各莊屯內遣其丁壯其穀種耒耜及諸田器耕牛皆令豫備於三旗內府官員新滿洲護軍披甲之中熟諳農事者擇而遣之呼爾湖之地其田以八旗諸王莊屯之丁壯耕之其穀種耒耜及諸田器耕牛咸令豫備熟諳農事之人擇而遣之墾闢耕種之時稷與

大麥油麥春麥四種穀皆可藝植稷宜多種之春麥宜少種之遣往耕田之人田既耕種畢則酌留耘田之人其餘人遣還穀既熟則所留耘田之人可以收穫此農人所食之米於古北口所貯之米石中計口而授之西拉木倫之地其耕田悉照原議遣盛京人役前往俟農畢秋成之後視豐收地方其治田人員該部議敘爾等其議以聞

康熙三十一年

諭大學士伊桑阿等積穀者至要之務也誠有所積貯雖遇災傷斷不致於饑饉但小民不知儲蓄每值豐收之年恣意糜費及逢儉歲遂底困窮今時屆麥秋可敕各該地方官勸諭百姓比戶量力共相樂輸委積儲峙州縣官將捐助者姓名與米數註冊秋成之後亦倣此行焉其春時乏食者貸與之至秋照數收入以為積蓄夫每年於麥穀告登之候勸勉捐輸則數歲之間倉廩充裕即罹灾祲民食自可不虞匱乏矣

康熙三十二年

諭內閣曰者盛京招民有議敘之例今西安等處流民尚有未歸本業者茲西安等處流民招復幾戶復歸本業助給牛種等物令之耕種收穫一季者其宜議敘吏戶二部察例以聞

諭內閣聞山東今年田收之後蝗螟叢生必已遺種於田矣而今歲雨水連綿來春少旱蝗則復生未可知也先事豫圖可不為之計與乘時竭力盡耕其田庶幾蝗種

瘞於土而糜爛不復更生矣若遺種即有未盡來歲復萌地方官即各於疆理區畫逐捕不使滋蔓其亦大有益也命戶部速牒直隸山東河南陝西山西巡撫等示所領郡縣咸令悉知田則必於今歲來春皆勉力耕耨蝗螟之灾務令消滅若郡縣有不能盡耕耨其田者蝗或更生則必力為捕滅毋使蝗灾為吾民患

諭戶部朕念切民生時厯宵旰或在宮禁之中或經巡省之地務以編氓疾苦備悉諮詢其從各省來京陛見官

員及往來奉使人等亦無不以該省雨澤曾否應時田畝有無收穫並問閭閻資生情形一一體訪比年以來因國家經費尚充遂將各省地丁額賦及舊欠錢糧節次蠲免即從前未經停征之漕糧亦逐年免征總欲使海隅蒼生培固元氣庶臻於家給人足之風今歲畿輔地方雖禾稼未獲稔收初意小民餬口之需猶足資給未必生計遂至艱難項者展謁

山陵沿途察訪民隱見今歲雨水過溢田畝被淹沒者甚

多穀耗不登米價翔貴又聞順天河間保定永平四府所屬皆然目前米價既貴將來春夏之際時值益昂小民必艱粒食此朕目所親覩若米歲錢糧仍然徵收朕心實有未忍順天河間保定永平四府康熙三十三年應徵地丁銀米著通行蠲免所有歷年舊欠悉與豁除行文該撫諭各屬務令人霑實惠以副朕子育黎元至意

康熙三十三年

諭內閣朕處深宮之中日以問閭生計為念每巡歷郊甸必循視農桑周咨耕耨田間事宜知之最悉誠能豫籌穡事廣備災祲庶幾大有裨益昨歲因雨水過溢即慮入春微旱則蝗蟲遺種必致為害隨命傳諭直隸山東河南等省地方官令曉示百姓即將田畝亟行耕耨使覆土盡壓蝗種以除後患今時已入夏恐蝗有遺種在地日漸蕃生已播之穀難免損蝕或有草野愚民云蝗蟲不可傷害宜聽其自去者此等無知之言切宜禁絕

捕蝗弭災全在人事應差戶部司官一員前往直隸山東巡撫令其申飭各州縣官親履隴畝如果處有蝗即率小民設法耨土覆壓勿致成災其河南山西陝西等省亦行文該撫一體曉諭欽依

康熙三十六年

諭內閣下河地方久罹水患朕心時切軫念前命挑濬白駒岡門等口原欲使水盡流通田皆涸出今見興化泰州等州縣積水尚多田仍淹沒民生甚屬苦累著行文

總漕總河親往會勘將下河積水何故壅塞不能迅流
應作何盡令歸海涸出民田之處詳閱議奏

康熙三十七年

諭內閣霸州新安等處此數年來水發時渾河之水與保
定府南之河水常有泛漲旗下及民人莊田皆被淹沒
詳詢其故蓋因保定府南之河水與渾河之水滙流於
一處勢不能容以致泛溢此二河道著左都御史于成
龍往保定府南河著原任總督王新命往作何修治令

其水自分流詳看繪圖議奏今值農事方興不可用百姓之力遣旗下丁壯備器械給以銀米令其修築伊等往時部院衙門司官筆帖式酌量奏請帶往於十日之內即令啟行

諭大學士伊桑阿等開濬下河民生攸繫朕為閭閻疾苦深切軫念曾命覬音布孫在豐于成龍王新命等專司開濬伊等俱奏工程告竣民生大蒙利益載在冊籍存部可攷人亦具在可以質詢也由今觀之祇是虛糜國

帑水勢並未消減田畝並未涸出所謂有益民生者果何在耶今桑格又奏當行開濬而九卿並不詳詰從前開濬諸人亦不稽考冊籍遽議准行如果此次開濬巨浸全消疆理盡復民業得濟朕於錢糧絕無吝惜即動發帑金令其興工而已至捐助事例並不宜允行即今山陝所捐銀米其事尚未明晰也若下河果如其所請疏鑿開濬而桑格等能必水即消田即出有裨於民以身家保奏即令開濬之御史吳甫生亦以此事條奏所

言甚是可將其疏并發九卿詳詢前次督濬者復稽攷
冊籍確議以聞

康熙三十九年

諭戶部國家要務莫如貴粟重農朕宵旰圖治念切民生
惟期年穀順成積貯饒裕於以休養黎元咸登樂利今
聞直隸各省雨澤以時秋成大熟當此豐收之時正當
以饑饉為念誠恐歲稔穀賤小民罔知愛惜粒米狼戾
以致家無儲蓄一遇歲歉遂至仳離著該督撫嚴飭地

方有司勸諭民間撙節煩費加意積貯務使蓋藏有餘
閭閻充裕以副朕重農敦本愛養元元至意

康熙四十一年

諭戶部朕躬理幾務年久深知稼穡之事念阜民之道期
於有備去冬北地少雪今春雨澤微降尚未霑足誠恐
蝗蝻易生有傷農事所在官吏亟宜先時預防直隸山
東山西河南陝西江北地方歷年積貯倉糧果否足額
該督撫宜確加稽核務使廩有餘儲不致匱乏其一切

預備事宜須悉心講求料理縱年歲不甚豐稔亦可賑濟無虞至直隸各省現今雨澤有無多寡著該督撫即行具摺奏聞以紓朕宵旰勤民之意

康熙四十二年

諭東省在京官員朕四次經過山東於民間生計無不深知東省與他省不同田間小民俱依有身家者為之耕種豐年則有身家之人所得者多而窮民所得之分甚少一遇凶年則已身並無田畝產業有力者流移於四

方無力者即轉死於溝壑此等情狀爾東省大臣庶僚
及有身家者亦當深加體念似此荒歉之歲雖不能大
為拯濟若能輕減所入田租以各贍養其佃戶不但深
有益於窮民即爾等田地日後亦不致荒蕪如果民受
實惠豈不勝謝恩千百倍耶這奏謝已悉所司知之

諭山西巡撫噶禮朕君臨天下四十餘載無一刻不以蒼
生為念近因西省望幸甚切故於冬時農隙減從輕騎
由晉以入秦入境以來觀風問俗見官方微有廉風民

生畧有起色閭閻之間俗樸尚儉朕心少慰朕自弱齡
讀書往往以不知窮簷僻壤之疾苦為嘆息所以留心
於官方吏治凡有往來者必先諮詢民情豐歉偶有失
時定加蠲賑且思晉省不通水運歲或不登即難籌畫
雖有州縣存貯之穀米未必實數具在反益不肖有司
之虧空也今歲山西收成頗佳爾等仰體朕愛民如子
之至意曉諭民間若豐歲用奢則荒年必至匱乏教以
禮義導以守法重農務本藏富於民則朕無西顧之憂

矣凡朕所經之處必大沛恩澤因今歲東省災甚已蠲
四十三年地丁錢糧又免雲貴廣西四川地丁錢糧所
以不能施惠但將四十二年以前山西所屬州縣未完
銀兩米草盡行蠲免以示朕加惠黎元之念

康熙四十四年

諭山東巡撫趙世顯朕為兩河告成楊家莊新河建閘故
來巡視因爾等同地方士民所請過江而南見百姓雖
不能家給豐裕且幸安居樂業而無菜色朕心少慰矣

編氓皆吾赤子數十年休息培養民雖至愚皆已深知
所以扶老攜幼日計數萬隨舟擁道歡聲洋溢者降衷
之誠也但人多路隘菜花麥秀徧地青苗不能保其無
損朕甚惜焉爾等即出示曉諭萬勿蹋壞田苗有負厘
念

康熙四十六年

諭浙江福建總督梁鵠等朕頃因視河駐蹕淮上江浙兩
省官員及地方紳士軍民咸環道遠迎懇請臨幸朕勉

順羣情涉江而南循省風俗所至郡縣見雨暘應時麥
苗蕃殖比閭樂業可冀盈寧雖山東一路尚未悉覩而
江浙田疇鬱蔥在望深愜朕懷方今二麥垂熟正將刈
穫之時一切扈從人員皆以次舟行不致蹂躪誠恐百
姓緣途迎送老稚扶攜動盈千萬越阡度陌未免踐傷
朕心甚為軫惜雖民情依戀出於悃誠但農事方殷應
令所過地方悉停止岸傍迎送且車駕來時小民業已
瞻覲茲節候漸熱朕舟行乘夜迎涼亦未可定民雖遠

來無由親見爾等督撫其張示徧加曉諭使各知悉俾無負朕重農愛民之意

諭內閣朕每次巡幸循歷方隅雖窮鄉僻壤小民之生計鮮不周知觀東南西北地勢水土與夫飲食衣服器用悉皆不同穀桑麻綿耕種各隨土宜非人力所能移奪地方官員將小民現在力作之務若能加意勸導使不致荒廢即為實能盡心之人今責成地方官令五畝之田種桑二株百畝之田種桑四十株此四十株之桑葉

養蠶幾何此桑從何處移植即令移植未必水土盡與桑木之性相合更閱幾年便可成用此等物情言者並未計及且山東人於蠶種初出時皆置之山間橡樹之上俟其結繭並無用桑育蠶之事此等處言者亦未之知小民惟利是從雖以法禁之不止若無利雖百計嚴督之不行此亦理之所必然者今當昇平之日惟以無事為本乃不度地理之燥濕不計水土之順逆欲強迫百姓募南人以教之蠶此斷斷乎不可行也李紹周所

奏已悉下所司知之

諭起居注官揆敘等朕今年於二月二十八日抵揚州彼時麥已秀矣至四月二十日回鑾則正在刈麥之時南方麥秀雖早於北方而仍與北方同熟至於穀稼菓品大畧皆然江南梅花正月即放至五月始實朕取至暢春園種之見其三月花放亦於五月結實花放於兩月之前而同至五月結實此皆水土之故也南方之物開花吐穗雖早而成實遲故食之難消北方之物開花吐

穠雖遲而成實速故食之易消皆土性冷煖自然不可
強者試於塞外種稻其地高寒難以收穫種別項之穀
則無如塞外豐茂者江南不及京都京都不及塞外朕
以此等土性向張玉書李光地言之彼皆心服謂朕所
見極是朕巡行各省所見諸物無不留心詳察故知之
甚明確也

諭江浙在京官員大學士張玉書等朕在宮中無刻不以
民間疾苦為念恐遇旱澇必思豫防至巡幸各省於風

俗民情無不諮訪即物性土宜皆親加詳考每至一方必取一方之土以驗試其燥濕今歲南巡江浙見天氣久晴所經河渠港蕩之水比舊較淺即慮夏間或有亢暘之患是時麥田雖甚豐稔然南方二麥用為麴蘖者多不似北方專資麵食南方惟賴稻米北方則兼種黍稷粱粟有攜北方黍稷及蔬菜之類至南方種植者多不收穫此水土異宜不可強也且江浙地勢卑下不雨則蒸濕人不能堪有雨則涼人皆爽豁雖地稱水鄉而

水溢易洩滂歲之為患尚淺旱歲則為旱甚劇北方經月不雨亦尚無礙南方夏秋間經旬缺雨則田皆圻裂禾苗漸槁矣喜雨亭記云十日無雨則無禾蓋謂此也江浙農功全資灌溉今河渠港蕩比舊俱淺者皆由素無儲蓄所致雨澤偶愆濱河低田猶可戽水濟用高仰之田力無所施往往三農坐困朕茲為民生再三籌畫經久之計無如興水利建閘座蓄水灌田之為善也江南省之蘇松常鎮及浙江省之杭嘉湖諸郡所屬州縣

或近太湖或通潮汐所有河渠水口宜酌建閘座平時
閉閘蓄水遇旱則啓閘放水其支河港蕩淤淺者並宜
疏濬引水四達仍酌量建閘多蓄一二尺水即可灌高
一二尺之田多蓄四五尺水即可灌高四五尺之田準
此行之可俾高下田畝永遠無旱澇矣爾等其以朕意
曉諭諸臣詳議以聞

諭工部朕宵旰勤民視如赤子無一時一事不思為閭閻
圖經久之計江南浙江生齒殷繁地不加增而仰食者

日衆其風土陰晴燥濕及種植所宜迥與西北有異朕
屢經巡省察之甚悉大抵民恃田畝為生田資灌溉為
急雖東南名稱水鄉而水溢易泄旱暵難支夏秋之間
經旬不雨則土坼而苗傷矣濱河低田猶可岸水濟用
高仰之地力無所施往往三農坐困朕茲為民生再三
籌畫非修治水利建立閘座使蓄水以灌輸田疇無以
為農事緩急之備江南省蘇州松江常州鎮江浙江省
杭州嘉興湖州各府屬州縣或近太湖或通潮汐宜於

所有河渠水口度地建閘隨時啟閉水有餘則宣泄之水不足則瀦蓄以備用其有支河港蕩淤淺者宜並加疏濬使引水四達仍行建閘多蓄一二尺之水即田高一二尺者資以灌溉矣多蓄四五尺之水即田高四五尺者資以灌溉矣行之永久可俾高下田畝無憂旱澇此於運道無涉而於民生實大有裨益今漕運總督與江浙督撫方料理截漕散賑爾部速移文該督撫等令將各州縣河渠應建閘蓄水之處並應建若干座通行

確查明晰具奏

康熙四十七年

諭工部去歲杭州等處田畝被災民生疲敝這支河港蕩
淤淺之處若勸諭百姓開濬恐地方官員藉此私派害
民亦未可定況需費無多著動用正項錢糧速行疏濬
特諭

康熙五十三年

諭戶部甘肅一帶地方去年春麥失收秋田亦歉經該督

撫奏報甚明其地俱係山田稍遇旱暵易致災荒是以舊歲特沛恩澤蠲免租賦現在雖據該督設法賑濟借糶資給牛種此外更應作何籌畫使小民得所永有裨益著遣工部右侍郎常泰大理寺少卿陳汝咸到彼會同該督撫詳察地方百姓情形確議具奏

康熙五十四年

諭直隸巡撫趙弘燮朕嘗讀無逸篇留心稼穡久矣去歲臘前瑞雪盈尺時屆陽節細雨連綿輿情歡悅早得布

康熙五十八年

欽定四庫全書

二年矣


康熙六十年

諭大學士九卿去冬雪大所以今春雨澤甚少大約冬雪多則春雨必少春雨少則秋霖必多此非有占驗而得知者也朕六十年来留心農事較量雨暘往往不爽且南方有雪有益於田土北方雖有大雪被風飄散於田土無益今歲山東得雨河南山西陝西未甚得雨備荒最為緊要不可不豫為籌畫若直隸山東河南料理已

屬非易至山西陝西其補救尤難古人云三年耕則有
一年之蓄九年耕則有三年之蓄言雖可聽行之不易
如設立社倉原屬良法但前李光地張伯行曾經舉行
終無成效至於各省積貯穀石雖俱報稱數千百萬實
在存倉者無幾即出陳易新之法亦不為不善第春間
僅有所出秋後並無所入州縣官侵蝕入已急則即以
折銀掩飾此等積弊朕知之甚詳其報荒之真偽虛實
朕亦無不洞悉如熱河所積穀石每年減價平糶秋收

糴還補倉數目無多稽查頗易所以每有餘糧耳語云
大兵之後必有凶年昔征勦三逆時豐收足以供給並
無一州一縣貽悞及平定以後亦間有歉收者雖然綢
繆未雨不可不為豫慮也邇來稍覺暎旱政事或有缺
失應行改正之處爾等會同詳議具奏

欽定授時通考卷四十七



總校官庶吉士臣侍朝

校對官編修臣裴謙

謄錄監生臣倪時慶